

► Remitido di Fundacion Accion Ambiental

Gruponan ambientalista no a reacciona tempran pero mas bien na tempo pa spierta pueblo

Pa medio di e remitido aki, Fundacion Accion Ambiental kier a reacciona ariba un publicacion haci pa Minister Marisol Tromp Diahuebs 8 di augustus na pagina 11 den matutino *Diario* relaciona cu e proyecto di hotel na Sero Colorado, Baby Beach, Boca Grandi y Rogers Beach.

Na unda Minister Marisol Tromp ta menciona cu "Gruponan ambientalista a reacciona hopi tempran" y cu e proyecto ta den un fase di prefactibilidad, y cu e estudionan ta bai tuma lugar ariba e parti di medio ambiente, loke no por sosode sin envolve e gruponan ambientalista.

E mandatario a pone den su publicacion cu e gruponan ambientalista ta bai wordo involvi y aki ta e caminda unda e desaroyadornan ta mara na e condicion di haci un estudio di impacto ambiental, envolviendo e gruponan menciona.

Fundacion Accion Ambiental despues di a haci un investigacion huridicamente di e proyecto di hotel na Sero Colorado, Baby Beach, Boca Grandi y Rogers Beach a bin haya documento cu ta muestra bon cla cu tanto Minister Briesen, Minister Marisol Tromp y Minister President, Nelson Oduber a sconde documentonan importante cu nan a firma cu Mr. Antonio Lopez de Haro Ramirez, dia 31 di juli 2002 relaciona cu e proyecto di hotel na Baby Beach.

Tanto prensa local,

gremionan y organizacionnan ambientalista no a ricibi copia di e documentonan oficial cu awor di firma dia 31 di juli 2002 pa gobierno di Aruba.

Esaki ta loke nos ta yama transparencia di gobierno?

Den e documento ta poni bon cla, cu e desaroyadornan ta haya tur e derecho for di gobierno pa traha cuanto rapport cu nan ta deseá, y cu nan mes ta bai controla nan mes. Mientras di otro banda Gobierno ta publica den prensa cu mester duna participacion na Gremionan, Departamentonan di Gobierno y Organizacion Ambiental pa cu e proyecto aki.

Pero loke nos di Accion Ambiental a bin constata cu Consejo di Minister no ta respeta ningun instancia den nos comunidad na unda tur e Ministernan den nomber di Aruba a firma un acuerdo cu Mr. Antonio Lopez de Haro Ramirez, sin duna oportunidad y participacion na departamentonan concerni di gobierno, gremionan y organizacionnan ambiental pa discuti of trata e proyecto di hotel na Baby Beach prome cu a firma cualquier acuerdo cu e grupo di desaroyadornan.

Fundacion Accion Ambiental como organizacion ambiental ta condena y desapropa totalmente e maneho cu Gobierno di Aruba ta hibando pa cu e proyecto di hotel na Sero Colorado.

Accion Ambiental por a tuma nota tambe con San Nicolas Business Association ta laganan mes wordo usa pa gobierno di Aruba pa metanan totalmente politico.

Accion Ambiental ta lamenta cu parlamentaria Carmelita Haynes

como tambe parlamentario Glenroy Wilson ta mal usa e proyecto di hotel na Sero Colorado, Baby Beach, Boca Grandi y Rogers Beach pa metanan politico pa purba di gana voto den e pueblo di San Nicolas.

E parlamentaria ta trece pa dilanti cu e encuesta cu e la haci ta muestra cu e pueblo di San Nicolas kier Hotel. Accion Ambiental ta bon informa cu e encuesta hacipae parlamentaria di AVP ta simplemente un propaganda politico pa hala atencion.

Fundacion Accion Ambiental ta kere 100% den un desaroyo economico pa San Nicolas y pa henter Aruba, pero e mester ta bon prepara y e mester por cumpli cu tur exigencianan di e departamentonan concerni di gobierno, gremionan comercial y hotelero, sindicatonan y organizacionnan ambiental. Accion Ambiental a trese como alternativa lowrise hotel estilo eco-lodge, bungalows of condominiums cu ta pertenece na e estilo y historia di Sero Colorado.

Fundacion Accion Ambiental ta totalmente contra pa traha hotelnan na e areanan costal manera Boca Grandi, Baby Beach y Rogers Beach, esaki despues di a haci un estudio di impacto ambiental. Den e estudio pre-eliminar di impacto ambiental haci pa expertonan di Accion Ambiental cu a bin for di exterior ta duna como conseho pa no traha nada ariba e areanan costal mencionando Boca Grandi, Baby Beach y Rogers Beach.

E areanan aki mester keda protega pa naturaleza, y na unda e departamento di gobierno VROM tambe ta compart e mesun criteria, mescos ta e caso tambe di otro

organizacionnan ambiental.

Segun expertonan e unico dos posibilidatnan cu ta keda ta na unda tabata hospital bieuw di Lago of na e parti pabao di Sero Colorado ariba e barancanan, pero esaki mester wordo studia profundamente prome cu bai traha un hotel eyan. Pa asina no haci daño na e cuebanan of tunelnan subteranio cu ta core bao di tera na Sero Colorado.

Accion Ambiental ta 100% di opinion cu San Nicolas y vecindario mester di un Centro Medico cu un Clinica completamente ekipa cu equiponan pa haci operacion, saca potret, pa atende tambe victimanan di kimadura y pa ta ekipa cu varios unidadnan intensivo pa trata victimanan cu condicionnan hopi serio y tambe cu cambarnan pa e ser femenino por duna luz. Fundacion Accion Ambiental por a tuma bon nota di e publicacion di Minister Marisol Tromp cu ta bisa lo siguiente "no ta asina cu pa medio di un "carta di interes" tur discusion ta caba, pero al contrario ta awor e discusion ta inicia." Letter of Interest", kiernan cu desaroyadornan tin cu cumpli prome y compromete pa e proyecto por bai dor.

Minister Marisol ta agrega cu gobierno ta wak e interes di diferente grupo pero finalmente interes general y logicamente bienestar di Aruba ta prevalece. E mandataria a splica tambe cu e "carta di interes" ta un indicacion cu

gobierno ta fuertemente interesa den e projectionan aki y tin confianza cu por cuminsa e proceso na e momento cu nan cumpli cu e condicionnan."

E mandataria ta bisa bon cla, cu gobierno ta dispuesto pa discuti y wak e interes di diferente grupo pero finalmente interes general y bienestar di Aruba ta prome y cu e firmamento di e carta di interes gobierno ta interesa den e proyecto.

Esey ta significa cu gobierno ta haci tur posibel pa tog bin cu e hotelnan, sin duna participacion na gremionan, departamentonan concerni di Gobierno y organizacionnan ambiental y social den nos comunidad. Esaki simplemente

pa complace e grupo di desaroyadornan, na lugar di interesnan general.

Tambe e mandataria ta trese cu e caso di Race Track y e proyecto di hotel na Baby Beach, Boca Grandi y Rogers Beach no ta mescos. Segun Accion Ambiental e caso di Race Track y proyecto di hotel ta mescos pa motibo cu e proyecto di Race Track tambe lo a construi hotelnan na Sero Colorado, Baby Beach, Boca Grandi y Rogers Beach. Pesey e pueblo di San Nicolas y Aruba en general den e

Accion di Firma Contra Race Track cu a colecta nuebe mil firma a bai contra tambe pa hotel wordo traha na Baby Beach, Boca Grandi, Rogers Beach y Sero Colorado.

Ta asina cu Minister Marisol Tromp y Minister Nilo Swaen como parlamentario den oposicion na aña 1999 a participa na varios demostracion y manifestacion contra di e proyecto di Race Track na unda cu hotel y restaurant tambe tabata inclui den e proyecto. Mientras cu awe na aña 2002 ta e mesun ministernan aki ta hayando presion for di den pueblo pa no traha mas hotel, pa motibo cu Aruba ta satura cu demasiado hotel y restaurant, na unda mester a importa trahadornan for di den exterior y na unda un gran cantidad di divisas a sali for di Aruba poniendo cu awe Aruba ta den problema grandi cu su finanzas publico y perhudicando tambe e economia di Aruba den su totalidad.

Por ultimo Accion Ambiental ta conseha Minister Briesen y Minister Oduber pa percura pa yena e camber di hotelnan na Eagle Beach y Palm Beach prome, y soluciona e problema di e trahadornan di Bushiri Beach Hotel, prome cu gobierno dicide pa bai traha un of dos lucht kasteel na Sero Colorado.

Accion Ambiental no tin tempo pa perde pa cada biaha bai recciona ariba publicacionnan sin contenido y cu no ta yuda comunidad cu nada.

Atentamente,

Directiva di Fundacion Accion Ambiental